



*Komunikadu Imprensa*  
*Tribunál Distritál Dili*  
*10 Feveiru 2015*

## **Tribunál konsilia krime ne'ebé tuir lei konsidera nu'udar krime ho natureza públiku**

Iha 4 Feveiru 2015, Tribunál Distritál Dili prejide julgamentu hodi konsilia no omologa pedidu desistencia keixa ba krime ofensa ba integridade fízika simples ne'ebé involve arguidu AJM hasoru nia alin fetu (FSM), iha Distritu Dili.

Ministériu públiku akuza arguidu kontra artigu 145 Kódigu Penál kona-ba ofensa ba integridade fízika simples.

Antes hahu julgamentu ba kazu ne'e, tribunál husu ba arguidu no lezada kona-ba arguidu no lezada nia relasaun no arguidu deklara ba tribunál katak lezada nu'udar arguidu nia alin fetu rasik no sira hela iha uma ida deit. Mezmu arguidu deklara ona ba tribunál, maibé tribunál kontinua konsilia kazu ne'e no omologa dezistencia keixa husi lezada.

“Kazu ne'e loloos konsidera nu'udar krime ho natureza violénsia doméstika tanba akontese iha relasaun família tuir artigu 2 alinea (1) Lei Kontra Violénsia Doméstika ne'ebé define kona-ba konseitu violénsia doméstika,” dehan Diretór Ezekutivu JSMP Luis de Oliveira Sampaio

Iha artigu 2 alinea (1) Lei Kontra Violénsia Doméstika defini katak:

“Iha lei ida ne'e, violénsia doméstika refere ba kualkér asaun, ka asaun lubuk ida, ne'ebé komete ona iha situaun familiár nian, ne'ebé hela hamutuk ka la hela hamutuk, membru família ida kontra membru ida, ka ninia membru sira seluk, ka husi ema ida ne'ebé iha relasaun ne'ebé bele influensia, hanesan fisika ka ekonómika, iha família ida nia laran...”.

JSMP rekoñese katak mesmu kazu ne'e la involve kestaun dependensia ekonomia entre arguidu ho lezada maibe iha influensia fíziku hosi arguidu ba lezada.

JSMP hanoin katak iha kazu ne'e tuir loloos ministériu públiku aleinde akuza ho artigu 145 Kódigu Penál kona-ba ofensa ba integridade fízika simples tenke konjuga ho artigu 2 alinea (1) no artigu 35 Lei Kontra Violénsia Doméstika, tanba kazu ne'e ho natureza krime públiku no la fo fatin ba tribunál atu konsilia no omologo kazu ne'e.

JSMP hanoin katak tribunál tenke trata kazu violénsia doméstika iha maneira ida ne'ebé rigorozu no mantein karakteristika husi krime ne'e rasik, ho nune'e dezisaun tribunál refleta duni sofrémentu ne'ebé lezada hasoru, atu evita arguidu potensial iha uma laran/família iha futuru sein hare ba kestaun kona-ba dependênsia ekonomíku. Se lae iha futuru sei iha kazu barak mak la hetan kondensasaun tanba konsiderasaun kona-ba tenke iha dependênsia ekonomiku entre arguidu no lezada.

Kazu ne'e rejista iha tribunál ho Nú. Prosesu 758/2014/TD DIL, Julgamentu tentativa konsiliaun ne'e prejide husi Juis singular Dra. Francisca Cabral, Ministériu Públiku representa husi Dra. Benvinda da Costa do Rosario no Dr. Bartolomeo de Araújo, arguidu hetan defeza husi Dr. José da Silva, husi Defensória Públiku.

Luis de Oliveira Sampaio  
Diretór Ezekutivu JSMP  
Diresaun e-mail: [luis@jsmp.minihub.org](mailto:luis@jsmp.minihub.org)  
[info@jsmp.minihub.org](mailto:info@jsmp.minihub.org)  
Telefone:3323883 | 77295795